



## 魚鱗斑

該年冬下仔有一日，偕看著天頂个雲當靚，像該魚鱗斑，吾姆行出禾埕臥頭看天，開嘴就講：「喔～有魚仔好捉囉！」「阿姆！你敢係講天缺，麼儕同你講，看著魚鱗斑就有魚仔好捉个？」「吾姆啊！」。

吾姆个阿姆就係吾姐婆，吾姐婆今係還在就百二歲咧，頭擺个老人家，有佢該隻年代个生活智慧，講話怕毋會信天來。毋過姐婆三十年前就上天做仙咗，今也無好問姐婆有影抑無影？好得吾姆聽過就在頭腦肚記下來，今晡日佢臥頭看著自家阿姆在魚鱗斑个天頂，就隨口拈轉一句老智慧，偕个心也跔等魚鱗斑轉到姐公屋頭前个山魚塘，想念姐公姐婆喊阿舅打魚請外孫个情景……。

該日魚鱗斑个雲景非常穩定，到咗第二日半朝晨，一鱗一鱗還本本在天頂，想起昨晡日吾姆講有魚仔好捉，該係麼个科學原理呢？偕拿起自然科學个書，研究這有關雲个形成原理。

雲係水汽形成个，從地面到天頂有各種名稱，盡矮个係濛沙煙，濛沙煙就係貼到地面在身邊个雲，人在濛沙煙肚看世界，看著朦朧个靚，係在濛沙煙外看濛沙煙，該就係浮嵐，浮嵐在山頂飛來飛去，山上人就在夢幻肚行入行出，好聽古个細人仔，就會想著孫悟空打筋斗雲，一環十萬八千公里。

係照雲个形投同高度來分類，做得分幾下種：除忒貼地个濛沙煙，再過高一息，在半天高一層一層个係層雲，還有直直衝上天頂高，像堵天樞个係積雲，積雲升到高天頂，分燥糠个冷空氣吸收部分水氣散開排列，遠遠看，就像一蕊一蕊像魚鱗个雲，頭擺人喊做魚鱗斑，這就係現代氣象个高積雲。高積雲再分高層風吹散拉長牽絲，就安到卷雲，卷雲因為薄，故所日頭一照就半晟光，像細妹人長長幼幼軟習習个頭那毛，非常靚，也係表示天時晴朗。

雲，成時也會盡得人驚，鋒面過境該央時，冷熱氣團一明一暗楚河漢界，半天烏雲大兵壓陣，就像遮天个大鑊蓋，看著就心肝頭撈撈。鋒面个雲層係緊來緊矮，就會帶來雨水，山塘有水，蒔田豐收就有望，毋過割禾晒穀个人，歸家人愛緊手搶收穀堆，緊緊張張。

魚鱗雲个天時大體係晴朗，故所有一句老古人言「天起魚鱗斑，晒穀毋使翻」。故所，吾姆看著魚鱗斑，正會講做得去看人打魚，因爭去打魚毋使著水衣仔，就有魚仔好食。吾姆隨口出个老古人言，還係有道理个。

作者：張捷明

### ☆詞彙學習☆

- 【魚鱗斑】ng<sup>ˇ</sup> lin<sup>ˇ</sup> ban<sup>ˊ</sup>：像魚鱗的斑紋，這裡是指天上狀似魚鱗的大面積高積雲。
- 【講天缺】gong<sup>ˋ</sup> tien<sup>ˊ</sup> kied<sup>ˋ</sup>：天馬行空，說一些沒有根據的故事。
- 【信天來】xin tien<sup>ˊ</sup> loi<sup>ˇ</sup>：天花亂墜信口開河。
- 【臥頭】ngo teu<sup>ˇ</sup>：抬頭。

- 【山魚塘】san<sup>ˊ</sup> ng<sup>ˇ</sup> tong<sup>ˇ</sup>：山坡上的小山塘。
- 【打魚】da<sup>ˋ</sup> ng<sup>ˇ</sup>：捕魚。
- 【堵天樞】du<sup>ˇ</sup> tien<sup>ˊ</sup> dun<sup>ˋ</sup>：撐住天的柱子。
- 【半晟光】ban cang<sup>ˇ</sup> gong<sup>ˊ</sup>：半透明。
- 【心肝頭撈撈】xim<sup>ˊ</sup> gon<sup>ˊ</sup> teu<sup>ˇ</sup> zad zad：心中沉悶。
- 【水衣仔】sui<sup>ˋ</sup> i<sup>ˊ</sup> e<sup>ˋ</sup>：雨衣。